

✳ ШАЕРТОДОН

Вашкалаез тус-тас медаз луы

Любовь ТИХОНОВА

Кез ёросысь Вьль Унтем шор ёзо школаын кема аръёс ини завуч луыса тырше Валентина Лекомцева.

Валентина Александровна 25 ар ини дышетэ физикалы, математикалы но информатикалы. Берло аръёсэ со аслыз эшшо одйг секыт ныпъет ватсаз на - школаысь музей-комнатаен кивалтыны одъяз.

- Школаямы нимысьтыз музей-комнатамы ой вал, - ужаны кутскемез сярсы маде Валентина Лекомцева. - 2014-тй арын ми сое кылдытймы.

Нылпиосын гурт кузя утчаськыса ветлймы. Бабушъёс кеносъёсысьтызы, ситъёсысьтызы, гулбечъёсысьтызы шедьтэм артериоссэс, тус-тас медаз луэ шуыса, ми доры вайылыны одъязы. Озы музей-комнатамес узырмытйзы етйн шуккон, вышкыос, черсон, куиськон но куэм дэра дэрэмъёс. Шыкыс тыр люкамьин вашкала чупконъёс но жоккышетъёс. Соосты борддоре опшылыны одъяськомы. Юн трос дйськут сётйз зуч кыллы



Туспуштэз Любовь ТИХОНОВА

но литературалы азьвыл дышетйсьмы Мария Дмитриевна Лекомцева. Озы музеймы вашкала арбериосын узыр но узыр луиз. Но жальяса верано, троссэ вашкала тйрлыкъёссэс адымиос куштйлыллям ни вылэм. Ми но егит дыръямы ом валалэ со арбериосты люканы.

1896-тй арын школаямы дышетскем нылпиосын туспуштэмэ шедьтймы. Со быдсак чужектэмьин ни, дуръёсыз кесыськемын. Кылем арын школамылы 120 ар тырмиз. Вашкала экспонатъёс эшшо но узыргес каро музеймес.

Кез ёросысь Вьль Унтем школаысь музей-комнатаен кивалтйсь В. Лекомцева.

Вьль Унтем школаын дышетскись нылпиос шумпотыса ветло музей, куддыръя урокъёсы но отын ик ортчыло. Чем гинэ доразы гуртоос но вулло, ялан ма но со сьоразы вайыло. Вашкала арбериосты люкам сяна, нылпиос, пересёлсэс гуртсы сярсы юалляськыса, исследовательской уж нуо, солэсь историзэ жечгес тодыны тыршо, калык пёлы вёлмыто. ***

✳ ШУНЫТ КЫЛ

Шаркан палъёс отё

Лия МАЛЫХ

Кык арлы одйг пол Ижын ортчыло «Шаркан жыт» пумиськонъёс. Шарканъёс Ижысь ас палъёссэс тодматожын азинсконъёсынызы, кырзаны-вераны быгатэменызы.

15-тй апреле филармониянын радъям пумиськон сйземын вал Удмуртиысь калык артистлэн, Россиысь дано артистлэн Григорий Титовлэн вордскемез дырсын 110 ар тырмонлы. Удмурт Шалыпин вордйськыиз Мыддорин (Титово) гуртын. Люкаськемъёс тодматскизы Григорий Ивановичлы сйзем «Мынам эше - кырзан» адъытонэн: пёртэм вакытысь туспуштэмъёсыныз, документъёсыныз. Концерт дыръя чужыськыиз дано артистлэн куараез но.

Григорий Иванович пёламы луысал ке, макем данъяськысал ас палъёсыныз! Туннэ нуналлы шарканъёс пёртэм удисъёсыя шаерамы азыпал радъёсын мыно. Шаркан ёролэн йырыз Василий Муклин люкаськемъёслы вакчияк вераз гурт удисын, лэсьтйськоньин, производство, спорт, культура но туризм удисъёсын азинсконъёсы сярсы.

Бадъым шумпотон кузьмазы кырзас-верасъёс. Кичабонъёслэсь зал но лэйказ кадъ. Арганчиез Александр Ашихминэз учкисъёслэн сцена вылысь лэземзы ик уг пот вал. Шаркан культура юртысь арганчиослэн «Шуд» ансамбльзы но задор шудэменыз мылкыдзэ лопкытйз. Нош макем чебер эктйзы Быги культура юртысь пинал нылъёс - «Ерпечкаос!» «Зазегпиос» эктонэнызы троссэ вылысь пинал дыразы вуттйзы, луоз. Упъямон, ужрад мынйз кык кылым, чужыськыизы вьль удмурт кырзанъёс. Керттйськон фабрикалэн «Любава» этноколлекциез нылкышноослэсь гинэ овёл, пиосъёслэсь но мылкыдъёссэс поромытйз.

Концерт дасямын вал видеофильмен суро. 2 час куспын ортчыса вуттй вордйськем палъёсмылэсь вань сэрегъёсэс: Мишкин палъёсысен куткыса, Зюзя, Ляльшур, Кыква гуртъёс котырысь данъяськымон но чебер интыостй котырским. Кызы уд данъяськы инкуазез утёнъя «Шаркан» паркен, отысь жужыт Каргурезен но Тол бабайлэн усадыбаеныз! Кузпалъяськысьёсты бордаз кыске Шарканкашур вамен выж. Удмуртлы-

кез, фин-угор культураез калыке вёлмытэменыз кыдэке кыстйськыиз ни Быги гуртлэн данэз. Пашур но Мувыр палъёс тодмо луизы «Алангасарлэн вужерез» кино пуктон интыен.

«Шаркан жытлы» сйзъыса, ёросысь «Вестник» газет чебер буёло нимаз номер поттэм. Отын адъиське ёролэн туннэ улонэз, газет тодматэ ёросын вордйськем тодмо но дано адымиосын.

Кызэ аръёс талэсь азыло «Шаркан жытъёслы» кутскон сётйз ёросэн со вакытёсы кивалтэм Александр Прохоров - али быдэсыя гурт хозяйствоя но сиён-юонъя министрлэсь ужзэ. Со кивалтон вакытэ ик Шаркан уката азинскиз. А. Прохоровен чопш пумиськонэ вуылйзы Россиысь Кун Думалэн депутатэз А. Загребин, культура но туризмъя министрлэсь ужзэ быдэсыя В. Соловьёв, мугорез кыдатон культурая, спортъя но егитъёсын ужан политика министрлэсь ужзэ быдэсыя И. Краснов но мукет кивалтйсьёс. Жыт пумысен мылкыдзэс вераса, кунос пусйизы Шаркан ёросэн но отысь калыкен данъяськон мылкыдзэс. Бен, Шаркантэк туннэ Удмуртилэсь азинсконзэ син азе пуктыны шут. ***

✳ ИВОРЪЁС

Гожъяло инкуазь сярсы

Наталья САМСОНОВА

15-тй оштолэзе Национальной библиотека вордскем шаермы сярсы кылбуръёсты лыдзонъя вожвыль-яськон ортчытйз.

Ужрад сйземын вал Инкуазез утён арлы. Егит кылбурчиослэн чопатсконазы вуизы Дэри, Вотка, Якшур-Бодья но Шаркан ёросъёсысь, Сарапул но Ижевск городъёсысь 20-лэсь уно пиналтёс.

Чопатсконын 2 номинация ялэмын вал: «Егит лыдзисъёс» но «Егит поэтьёс». Котыкудйз кылбур вордскем шаерлэсь инкуазьзэ возматаны кулэ вал.

Нырысетй номинация пырыськисъёс лыдзизы профессиональной авторъёслэсь инкуазьлы сйзем кылбуръёссэс. Чужыськыизы зуч, удмурт, бигер кылъёсын гожтэм кылбуръёс. Библи-

отекаын ужасълэн Елена Зембековалэн ивортэмезъя, Ижысь 6-тй гимназиысь Анастасия Хузина К. Гердлэсь «Бубылиос» кылбурзэ удмурт кылын лыдзиз, нош Сарапулысь 1-тй школаысь Дамир Габдуллин Ф. Каримлэсь кылбурзэ - бигер кылын. Таяз номинацын вормысь луиз Якшур-Бодья гимназиын дышетскись Алина Гырдымова. Со лыдзиз Р. Рождественскийлэсь «Монолог царя зверей» кылбурзэ.

Нош 2-тй номинация пырыськемъёс лыдзизы асьсэлэсь гожтэм чуръёссэс. Таяз номинацын вормысь луиз Дэри ёросысь Ягул школын дышетскись Анастасия Антонова. Со лыдзиз «Палэз вай» кылбурзэ.

Нош нимаз приз басътыз Вотка ёросысь Черновской школаын дышетскись Никита Глебкин «Былина о сосне» кылбурез понна. ***

«Ваньмыз ортчэ» - 3-тй интыын

Мария ВЕКШИНА

Выжы калыкъёслэн «Евровидениязы» удмурт кырзан басътыз 3-тй инты.

Конкурсын «Ваньмыз ортчэ» кырзанзэ быдэстйз бавлы удмурт Павел Александров. Норвегиысь Каутокейно карысь сцена вылын вожвыльгясыкызы 8 выжы калыкъёслэн кырзасъёсы.

- 3-тй инты! 2-тй интыозь оз тырмы 1 балл. Но

мон талы но шумпотйсько, - шуиз Павел Александров конкурс йылпумъяськем бере. Конкурсын 1-тй инты басътыз саам кырзас, 2-тй луиз Нидерландыысь фриз кылын кырзас.

Вераны кулэ, выжы калыкъёслэн «Евровидениязы» нырысьсэ ортчиз 2002-тй арын Леуварденин, Норвегиысь Фрисландилэн шоркараз. Та дыр куспын саам кылын кырзасъёс 4 пол vormлызы ни. ***

Реклама

Отруби, корма, мука, зерно
г. Ижевск, Гагарина, 83/1, тел. 8 (909) 052-01-51

Реклама

МИНИСТЕРСТВО КУЛЬТУРЫ И ТУРИЗМА УДМУРТСКОЙ РЕСПУБЛИКИ ГОСУДАРСТВЕННЫЙ НАЦИОНАЛЬНЫЙ ТЕАТР УР РЕПЕРТУАР НА МАЙ 2017 ГОДА Касса 78-45-92 www.udmteatr.ru	
2/вт. 16.00	« МЫ - ЭХО ... » театрализованный концерт, посвящённый Дню Победы 6+
4/чт. 16.00	« МЫ - ЭХО ... » театрализованный концерт, посвящённый Дню Победы 6+
5/пт. 10.00	« МЫ - ЭХО ... » театрализованный концерт, посвящённый Дню Победы 6+
18/чт. 18.30	« ВЫХОДИЛИ БАБКИ ЗАМУЖ » народная комедия в 2-х действиях Ф. Буляков 16+
24/ср. 18.30	ПРЕМЬЕРА!!! « ЖЕГАСЬ ЗОР » (« В ОЖИДАНИИ ДОЖДА ») мелодрама в 2-х действиях Р. Николаева 12+
СПЕКТАКЛИ ДЛЯ ДЕТЕЙ	
27/сб. 11.00	« ВОЛШЕБНИК ИЗУМРУДНОГО ГОРОДА » сказка в 2-х действиях А. Волков 0+
ГЛАВНЫЙ РЕЖИССЁР ТЕАТРА - ЗАСЛ. АРТ. УР А. ЛОЖКИН	